

CACA CHE NDONDA TAH IHAN CHE RENTĒ YĒ DEVAÇO HEBREO

*Dechuh Dendiohs Daya ye, cah ye, checadino
ihyan iyehnse ndudo yahn ye*

¹ Ro menan me ne, ama ndeh yune man, ama nuhn ino Dendiohs man, cah cuande ye ndudo yahn ye ihyan profeta cava che cuahndudo ye, cahnevan ihyan ndico yuhn vo.

² Man adiva ne, dechuh ye Daya ye, ndahco ye nducuahn dehtenduh tah ye. A nduco ihyan min dendah ye iyehnse. Dechuh ye ihyan, te nduco ihyan min te ye ndudo yahn ye, checadino vo.

³ Nduhca yahn che rendihco dave yahn ne, tihca rihco ro ihyan min vederihquentiyon yahn Chida ye. Ihyan min nduco Chida ye ne, dama no ye. Ihyan min ne, numacuahn vederihquentiyon yahn ye, redin ye cudado iyehnse. A ihyan min che nedihve ye yahn nunde yuhn vo, ndaco vo vederenchahco. Tuhme chihnde ye vahchetero lado tah cuaco Dendiohs.

*Daya Dendiohs ne, tahque ndinan ye che co
nducoyaca angel*

⁴ Daya Dendiohs ne, tahque ndinan ye che co nducoyaca angel, te tahque yudo vederihquentiyon ndahco Dendiohs tah ye.

⁵ Tihca, te Dendiohs ne, nde menahn hua rahn ye ri ye nde ama angel:
Di che Dayá.

Mañ ro cuh chihco ró che Daya di.
 Nde hua rañn ye yahn nde ama ángel:
 Daya ihyan.

U che Chida ye.

⁶ Ate cuahn che dechuh ye Daya ye che menañ iyehñse ne, rañn ye:

Nchuhn, nducoyaca ángel yáhn, cuendeva ne yavenañ ye.

⁷ Me yahn ángel ne, tuhca rañn ye:

Dín che co nchuhn nduhca vaco mañ, ruchiyahn mañ.

⁸ Ate yahn Daya ye ne, rañn ye:

Di Dendiohs, vederihquentiyon yehn ne, hua nda ro che cuihno.

Numa cuaco rihquentiyen.

⁹ Renan ine nducuahn che ndah, ne racondah vedame nducuahn che chihnga.

Chemin che u Dendiohs yehn, redín che tahque ri yene che co nducoyaca combiero yehn.

¹⁰ Namin rañn ye:

Di Dihve ihyan iyehñse, nde ro menañ me ne, dendah iyehñse mañ, ñañ ro mañ.

¹¹ Chemin ne, va che cuihno, ate di ne, conen cuahn dama.

Nducuahn dehtenduh chemin chan ne, va che co ndico nduhca che ri ndico tino.

¹² Din anduhca che nehn nduco dehtenduh chemin chan, cahnevi anduhneca ndete che ama tino, ne ndacorun.

Ate man di, hua nda ro che ndacoron, nde hua nda ro che coh.

¹³ Nde menahn hua rañn Dendiohs ri ye nde ama ángel:

Cuihnde lado tah cuacó numanahn che ndahco ndiyá ihyan che hua ri rendihche ye di, cava che nevahnecon ye di.

¹⁴ Nducoyaca ángel ne, vaco che redin ye ntiyon yahn Dendiohs. Redechuh ye ihyan cava che conan ye ihyan iyehense che quenán cuma che ndevahn ye.

2

Hua ndahca che cahcoman vo Ndudo yahn Dendiohs

¹ Nducote tahque yudo vederihquentiyon yahn Dihvo vo Jesucristo che co ángel ne, chemin che quenán cuma che cuahtenun ino vo ndudo che a chihnevan vo cava che hua cahcoman vo.

² Tihca, te nducote a chinahn ndudo yahn Dendiohs che dechuh ye nduco ángel a rahn me, ne ihyan che chahcotahn ye yahn ndudo min, chendihco ye nunde, a chi ye castigo che redin yahn che co ye ne,

³ namin uvo ne, hua co ndevahn vo ndete che hua tumacah vo yahn ndudo ndah yahn vederenchahco che rete Dendiohs uvo. Ndudo min ne, a Dihvo vo Jesucristo menan vih cahndudo ye, ne nuhn che chihnevan nuhn ndudo min ne, tumacadino nuhn che cuaco.

⁴ Avane ne, ama ndeh nan vederihno din Dendiohs, chihco ro ye che cuaco, nde din ye che chenán cuma vo vederihquentiyon yahn Vaco Ndah yahn ye tunoca che nahn man ye.

Dihvo vo Jesucristo ne, nda ye muhn iyehense cuh, ndaconda ye ihyan

⁵ Vederihquentiyon cuh che rendahconun yān che va che cuhnde ne, hua chihco Dendiohs tah ángel.

⁶ Hua, te ama cuan nan Ndudo yahn ye dirun ama ihyan tuhca:

Dendiohs, nde hua rigonun chihve ihyan iyehmse cava che necahco ne ihyan.

Nde hua rigonun chihve ye cava che din ne cudado ihyan.

⁷ Numanahn min ne, tahque doh vederihquentiyon cah ne ihyan che co ángel.

Van nducuahn dehtenduh che dendah ne ne, tahque cah ne vededevano ihyan.

Cah ne vederihquentiyon ihyan cava che cahcantiyon ye nducuahn dehtenduh che dendah ne.

⁸ Ndahco ne nducuahn dehtenduh tah ye.

Nducote ndahco Dendiohs nducuahn dehtenduh tah ihyan ne, nducuahn va che cahcantiyon ye. Man ro cuh ne, ametah nevah necun nducuahn dehtenduh ihyan.

⁹ Ate Dihvo vo Jesucristo che cuaco ne, nducote chih ye ne, renevah necun nducuahn dehtenduh ihyan, rendeva yavenan ye. Numacuahn vedeyahino cah necun Dendiohs che chih ye cava nducoyaca ihyan iyehmse.

¹⁰ Nducuahn dehtenduh ne, yahn Dendiohs. Man ye dendah ye, ne nahn ndeva ye nducoyaca daya ye vahchetero. Chemin che quenán cuma che cah yune ye che chuhrihn Dihvo vo Jesucristo, dinahn ye nducuahn, ndedevahn ye ihyan yahn ye.

¹¹ Ihyan che rendevahn ye mañ, ihyan min che rendedevahn ye ihyan mañ ne, ðaya Dendiohs nducoyaça ye. Chemin che Dihvo vo Jesucristo, ihyan min che Ðaya Dendiohs ne, hua ri cuihñañ ye che redin dihno ye ihyan,

¹² nduhça che a ndirun ñañ Ndudo yahn Dendiohs tuhça:

Nté yahn ne nduco dihnó.

Caťa himno, ndevá yavenañ ne vañ nducoyaça ihyan yahn ne.

¹³ Namin ndirun:

U ne, richahtinó Dendiohs.

Namin ndirun:

Muhn quenún nduco ðayá che te Dendiohs u.

¹⁴ Nducoyaça ihyan che dihno ye vih ne, ðama ndaťa yahn ye. Chemin che Dihvo vo Jesucristo ne, ndo ye nduhça ihyan iyehnse çaťa che chi chih ye, ndaħco ndiya ye chundah, saħn min che redin se che rinda ihyan,

¹⁵ ne ndedevahn ye nducoyaça ihyan che hua va mañ chedave yahn ye cuahn ðama, vaħ ye vederih.

¹⁶ A devano vo te Dihvo vo Jesucristo ne, nda ye çaťa che ndedevahn ye ihyan che ndaťa yahn Abraham, ndiyu çaťa che ndedevahn ye ángel.

¹⁷ Chemin che quenan cuma che ndo ye ðama nduhça ihyan iyehnse, tumacadino mañ ye nducuaħn vederihñ çaťa che tahque conan cuma ye vedevahino nduco vo, ne cochahtino vo ihyan. Redin ye cuðado uvo, raħn nan ye uvo ñañ Dendiohs, nde chihco mendahn ye ihyan, chih ye çaťa che nchahco ye nunde yuhn vo.

¹⁸ Nducote chuhrihn man ye, tumarande chundah ihyan ne, tahque nun rendedevahn ye ihyan che retumarande se ihyan.

3

Vederihquentiyon che quenan cuma Dihvo vo Jesucristo ne, tahque yudo che co vederihquentiyon che quenan cuma Moisés

¹ Dihno che a tendahnun Dendiohs nchuhn, nducote a nedin yahn ye nchuhn ne, cuiquendi ne yune yahn Dihvo vo Jesucristo, ihyan min che dechuh ye ihyan cava che din ye cudado uvo, tihyon yune ye uvo che cotahno vo ihyan.

² Nduhca che dinahn Moisés yahn Dendiohs van nducoyaca ihyan yahn ye ne, tihca dinahn Dihvo vo Jesucristo, ihyan min che ndahco Dendiohs vederihquentiyon tah ye.

³ Dihvo vo Jesucristo ne, redin yahn che tahque rendeva vo yavenan ye che co Moisés. Tihca, te ihyan che rihno ye ama vah ne, ihyan min che ndeva vo yavenan ye, ndiyu vah me.

⁴ Queri ama vah ne, va ihyan che dendah ye. Namin nducuah che va iyehne ne, a Dendiohs che dendah ye.

⁵ Cuaco te Moisés ne, din ye ntiyon yahn Dendiohs, dinahn ye van nducoyaca ihyan yahn ye. Ntiyon che quenan cuma ye ne, che cuahndudo ye ndudo yahn Dendiohs tunoca che rech ye ihyan.

⁶ Namin Dihvo vo Jesucristo ne, dinahn ye, ate nde tahque yudo vederihquentiyon quenan cuma ye, te nducote ihyan min che Daya Dendiohs ne, ndinan ye van nducoyaca ihyan yahn ye. Uvo ne,

a ihyan yahn Dendiohs uvo, ndete che quendi vo numacuahn vedeyeno cochahtino vo ihyan nde nda ro che ndeva ye uvo.

Ihyan che cuahtenan ye nan Dendiohs

⁷ Nducote tihca ne, ndahca che dinahn vo ndudo che, numacuahn vederihquentiyon yahn Vaco Ndah yahn Dendiohs, a ndirun tuhca:

Man che cahnevan nchuhn ndudo yahn,

⁸ hua din cheche ne chedave yahn ne nduhca che din ihyan ndico yahn ne che chahcotahn ye yahn,

ducherino ye u cuahn che chahtechica ye yahn nan che metah duhva.

⁹ Ihyan ndico yahn nchuhn ne, hua chitahno ye u, andahre ndihchero ye vederihno che din nduco ye chete o raco nduyo.

¹⁰ Chemin che chi tan nduco ye, ne ndedecadinó: “Ihyan sih ne, hua richahtino ye u numacuahn chedave yahn ye, nde hua redinahn ye che rihquentiyón.”

¹¹ Chemin che chi tan nduco ye, ne numacuahn vedeyudo chihco dama inó che hua nda ro che ndeva ihyan, cuahtenan ye nducó.

¹² Dihno, cuihco nducoyaca nchuhn cudado. Hua din cheche ne chedave yahn ne, cahcoman ne che ritahno ne Dendiohs, ihyan min che va ye vahchetero.

¹³ Tahque ndah ne, coyahve ama tama ne vih ro ro, numanahn che chenah ne iyehense, cava che nde ama ne hua cahnceh man ne nchuhn, din cheche ne chedave yahn ne, cuahtendihco ne nunde.

14 Tihc̄a, te nd̄a ro che chi Dihvo vo Jesucristo ne, ndeva ye uvo ndete che quendi vo numa ino vo cochahtino vo ihyan, nduhc̄a che richahtino vo ihyan nde ro che can̄an chitahno vo ihyan.

15 Nahn che cahcovan vo nduhc̄a che yahve Dendiohs uvo tuhc̄a:

Man che cahnevan nchuhn ndudo yáhn, hua din cheche ne chedave yahn ne nduhc̄a che din ihyan ndico yahn ne che chahcotahn ye yáhn.

16 Nducoyaca ihyan che ndetendah Moisés nación yahn Egipto ne, a ihyan chahn che chihnevan ye ndudo yahn Dendiohs, ne chahcotahn ye.

17 Ihyan che chahtendihco ye nunde, ne chih ye yahn nan che metah duhva ne, a ihyan chahn che chi tan Dendiohs nduco ye.

18 Ihyan che hua dinahn ye yahn Dendiohs ne, a ihyan chahn che, numacuahn vedeyudo, chihco dama ino Dendiohs che hua nd̄a ro che ndeva ye ihyan, cuahtenan ye nduco ye.

19 A devano vo te hua chi tuno ihyan chahn nan Dendiohs, yahn che hua chitahno ye ihyan.

4

1 Chemin che numanahn che rete ca Dendiohs ndudo yahn ye che ndeva ye uvo ne, nahn che cahco vo cudado, denan vate ama o vo che hua tuno vo nan ye.

2 Cah Dendiohs ndudo ndah yahn ye ihyan ndico chahn, ne namin te ye uvo. Ate ihyan chahn ne, nde hua chichihve che chihnevan ye, yahn che hua chitahno ye.

³ A uvo che chitahno vo che ndeva Dendiohs uvo, cuahtenan vo nduco ye, te rahn ye yahn ihyan chahn tuhca:

Chemin che chi tán nduco ihyan sih, ne numacuahn vedeyudo chihco dama inó che hua nda ro che ndevá ihyan, cuahtenan ye nducó.

Cuahn che chihno ntiyon yahn Dendiohs che dendah ye iyehense ne, a va yan ye che ndeva ye ihyan cava che cuahtenan ye nduco ye.

⁴ Cuaco chemin, te ama cuan nan Ndudo yahn ye ndirun yahn ro sabado tuhca:

Ro sabado ne, nducote a nihno ntiyon yahn Dendiohs che dendah ye iyehense ne, chihnde tuhno ye.

⁵ Namin tama cuan nan Ndudo yahn ye ndirun tuhca:

Hua nda ro che ndevá ihyan sih, cuahtenan ye nducó.

⁶ Nducote tihca ne, a ndero ndi che a va yan Dendiohs che ndeva ye tama te o ihyan, cuahtenan ye nduco ye. Ihyan chahn che chihnevan ye ndudo ndah yahn Dendiohs menan ne, hua tuno ye nan ye yahn che chahcotahn ye.

⁷ Chemin che chihno ama ndeh nduyo ne, ndaconan yahve Dendiohs ihyan tama yune. Yahn chemin ne, a dirun. Din ye che dirun David tuhca: Man che cahnevan nchuhn ndudo yahn Dendiohs ne,

hua din cheche ne chedave yahn ne.

⁸ Nan che ndeva Dendiohs ihyan, cuahtenan ye nduco vih ne, ndiyu yahn nan che nda Josué nduco ihyan ndico chahn, te ndete che a min ne,

ametaḥ ndaconan raḥn Dendiohs che ndeva ye iḥyan.

⁹ Devano vo te comān va che ndeva Dendiohs iḥyan yaḥn ye,

¹⁰ te iḥyan che ndeva ye ne, cuahte tuhno ye nduhcā che chihnde tuhno mān ye ro che chihno ntiyon yaḥn ye che dendah ye iyehnse.

¹¹ Chemin che nahn che din nun ino vo cava che ndeva Dendiohs uvo. Condi dāma co āma o vo nduco iḥyan ndico chahn che hua chitahno ye.

¹² Tihcā, te Ndudo yaḥn Dendiohs ne, yudo vederihquentiyon yaḥn, redin che renda iḥyan nān ye. Tahque nun ca renda chete chedave yaḥn iḥyan che co āma espada che o can yaḥn, ne rihco ro vederendedecadino yaḥn ye.

¹³ A Dendiohs che techecade ye yaḥn iḥyan. A iḥyan min che dendah ye nducuahn, ne metah nde āma nān dehtenduh che co conun ndeh nān ye. A nān ye va nducuahn.

Dihvo vo Jesucristo ne, nda cuande ye iḥyan yaḥn ye

¹⁴ A Dihvo vo Jesucristo Daya Dendiohs, che nda cuande ye uvo. Iḥyan min ne, conān ye vahchetero, raḥn nan ye uvo nān Dendiohs. Chemin che nahn che quendi vo numa ino vo cotahno vo iḥyan.

¹⁵ Dihvo vo Jesucristo ne, tumarande chundah iḥyan nān nducuahn, ate hua quendihco ye nde āma nunde. Chemin che, nducote mān ye chuhrihn ye ne, a devano ye nduhcā che rechuhrihn vo, ne renan vahino ye uvo.

¹⁶ Mañ ne, nahn che dehve rahco vo, covah vo nan Dendiohs yuhn vo, ihyan min che yahino ye uvo, cava che numacuahn vedeyahino man, vedevahino man, conan ye uvo cuahn che yah rahno vo.

5

¹ Queri ama chidocuyan ndinan ne, retendahnun Dendiohs ihyan van ihyan iyehne cava che cahma nan ye ihyan nan Dendiohs man, rihno ye ite che co te vedino cava nunde yahn ye man.

² Chidocuyan chahn ne, nducote ihyan nunde ye nduhca ihyan chenahn ne, chemin che riquendah ye vedechahtino cava ihyan tundo man, ihyan che redinda ye man.

³ Va che cahno ye ite che co te vedino cava nunde yahn ihyan yan, ne nducote namin ihyan nunde ye ne, quenan cuma che cahno ye ite che co te vedino cava nunde yahn man ye.

⁴ Nde ama ihyan ne, hua co tendahnun man ye vederihquentiyon min, conan cuma ye. Atenan man Dendiohs retendahnun ye ihyan che recah ye vederihquentiyon min nduhca che cah ye Aaron.

⁵ Atihnoca Dihvo vo Jesucristo. Hua tendahnun man ye vederihquentiyon min, quenan cuma ye. Tahque ndah ne, a man Dendiohs tendahnun ye ihyan. Rahn ye ri ye ihyan:

Di che Dayá.

Man ro cuh chihco ró che Dayá di.

⁶ Namin rahn ye ri ye ihyan nduhca che ndirun nan Ndudo yahn ye tuhca:

A tendahnún di che co chidocuyan ndinan, cuhnde tah vederihquentiyon nduhça che quen cuma Melquisedec,

ne hua nda ro che cuihno vederihquentiyon yehn.

⁷ Cuahn che quechica Dihvo vo Jesucristo muhn iyehanse ne, covah ye numa ino ye, nde chaco ye, ne Dendiohs, ihyan min che va vederihquentiyon yahn ye che ndedevahn ye ihyan tah vederih ne, chihcovan ye yahn che ndeva Dihvo vo yavenan ye.

⁸ Andahre Daya Dendiohs ihyan ne, ate chi nino ye dinahn ye van nducuahn che chuhrihn ye.

⁹ Cuahn che chenan dinahn ye nducuahn ne, chihco mendahn ye ihyan, chih ye cava che, nducoyaca ihyan che cotahno ye ihyan ne, ndevahn ye, ne cuahtenan ye vahchetero numacuahn ro.

¹⁰ Tihça, te a tendahnun Dendiohs ihyan che co ye chidocuyan ndinan, cuhnde tah ye vederihquentiyon nduhça che quen cuma Melquisedec.

Cahnda che cahcoman vo che ritahno vo Dihvo vo Jesucristo

¹¹ Ama va ca dehtenduh che nahn te cuandé nchuhn, ate ama vahche che din che conahn ne yahn che hua rihco ne che conahn ne.

¹²⁻¹³ Ametah ro che ritahno nchuhn Dihvo vo Jesucristo, ate ndotenan che man ne cacuahn ne ne, rendotenan ne che ndaconan cacuahn ihyan nchuhn dehtenduh che nde hua vahche nan vederihquentiyon yahn Dendiohs. Nduhça decuah yuno che hua ri che cheh dehtenduh, te deman leche rih ne, tihchan nchuhn. Hua renahn ne

vederihquentiyon yahn Dendiohs, nde hua retumacadino ne taça che cuahtechica ne runecade.

¹⁴ Ihyan che ndah renahn ye vederihquentiyon yahn Dendiohs ne, a ihyan chahn che devano tendahnun ye dehtenduh. Riquendi ye cha che ndah, ne rihcoman ye cha che hua ndah.

6

¹ Nducote tihça ne, quendi vo cuahn ndah vo vederihquentiyon yahn Dendiohs cava che conahn ndah vo. Dehtenduh che chahn vo cuahn che cade chitahno vo Dihvo vo Jesucristo ne, ndiyu dechemin dechemin cuahn vo cuahn dama, te ama va ca vederihquentiyon yahn ye che nahn che cuahn vo. Hua deman yahn nduhça che rento ino ihyan nunde yahn ye che redin che rinda ye man, nduhça che ritahno ihyan Dendiohs man,

² nduhça che redenune ihyan man, nduhça che renahn tah ye ihyan, revah ye cava ye man, nduhça che ntuche tenahn man, nduhça che techecade Dendiohs yahn ihyan nunde, din ye castigo ihyan cuahn dama man. Hua deman dehtenduh chemin chan che va che cuahn vo,

³ te ama va ca vederihquentiyon yahn Dendiohs che cacuahn nchuhn ndete che cuahnecun ye.

⁴⁻⁶ Ihyan che a chenahn ye vederihquentiyon yahn Dendiohs man, ndudo ndah yahn ye man ne, tumacadino ye vedeyahino yahn ye man, vederihquentiyon yahn Vaco Ndah yahn ye man, vederihquentiyon che cuahtenan ihyan vahchetero man. Ndete che cuacondah vedame ye Dendiohs

ne, ama yune denda ye, te anduhneca che ndaconan nahn yah ye Dihvo vo Jesucristo, din duche yahn ye ihyan nan nducoyaca ihyan.

⁷ Nduhca ama yahn nan che ndahca ran co ne, ndete che ndah ri chendata yahn ihyan ne, nedin yahn Dendiohs yahn min.

⁸ Ate ndete che deman chano yan ri ne, din dine ye, nde cahco vih ye cava che cuco.

Richantino vo Dihvo vo Jesucristo cuahn dama

⁹ Dihno che yahino nchuhn, a dirun yahn ne nduhca che rahno ihyan che racondah vedame ye Dendiohs, ate a devano cuaco che a ndedevahn ye nchuhn, redin ye che runecade vatechica ne.

¹⁰ Dendiohs ne, ndah ye, ne ra cuande ye nduhca che din yahino ne ihyan yahn ye, chinan ne ihyan, nde rinan ca ne ihyan.

¹¹ Nahn che quendi nchuhn numa ino ne nduhca che a cochi ne, nde nda ro che chenan ino vo cuahn che ndeva Dendiohs nchuhn.

¹² Hua nahn che din dahnde nchuhn. Tahque ndah ne ne, cuiquendi ne yune yahn ihyan che chitahno ye Dendiohs, ndichantino ye che ndedevahn ye ihyan nduhca che a necah ye ndudo yahn ye.

¹³ Cuahn che cah Dendiohs ndudo yahn ye Abraham ne, cah ye numacuahn vederihquentiyon yahn man ye, te ametah tama ca ihyan che tahque yudo vederihquentiyon yahn ye che co man ye.

¹⁴ Rahn ye ri ye Abraham: “Cuaco rahn ri di che ama din che ndah ndoque, ama din che co yahn ndata yehn.”

¹⁵ Abraham ne, quenan rino ye numacuahn vedechahtino nde chinahn ndudo che çah Dendiohs ihyan.

¹⁶ Ihyan iyehnse ne, cuahn che çah ye ndudo yahn ye ne, rendaḥconun yan ye Dendiohs, te ihyan min che taḥque yudo vederihquentiyon yahn ye. Cuahn che tiḥçā çah ye ndudo yahn ye ne, nde nan che çahma ye, metah.

¹⁷ Namin Dendiohs, cuahn che çah ye ndudo yahn ye Abraham ne, çah ye numacuahn vederihquentiyon yahn man ye, chihco ro ye çava ihyan yahn ye che dinahn ye.

¹⁸ Tiḥçā çah Dendiohs ndudo yahn ye numacuahn vedeyudo, ne co cochahtino vo ihyan, te redinahn ye ndudo yahn ye. Nducoyaço vo che a ndaḥco vo chedave yuhn vo taḥ ye che ndedevahn ye uvo ne, hua dehve raḥco vo, te ndedevahn ye uvo nduhçā che a necah ye ndudo yahn ye.

¹⁹⁻²⁰ Quenan cuma che ndevahn chedave yuhn vo, ametah che ndedecadino vo. A chitahno vo Dihvo vo Jesucristo, ihyan min che va ye vahchetero, raḥn nan ye uvo nan Dendiohs çava che co conda vo min. Ihyan min ne, anduhneca ama chidocuyan ndinan che va taḥ ye vederihquentiyon nduhçā che quenan cuma Melquisedec che hua nda ro che cuihno.

7

Va taḥ Dihvo vo Jesucristo vederihquentiyon nduhçā che quenan cuma Melquisedec

¹ Melquisedec ne, rey yahn yan Salem, namin chi ye ama chidocuyan ndinan yahn Dendiohs, ihyan min che ama yudo vederihquentiyon yahn

ye. Cuahn che ndaconan Abraham che chahn ye, cuhn ye nduco ino cun rey chahn, decuihno ye ihyan ne, chahn Melquisedec, chendi yune ye ihyan, ne chica ye che conan Dendiohs ihyan.

² Me Abraham ne, ndahco ye neve dehtenduh che ndaca ye van canda me tah ihyan min. Nan che ndiche dehtenduh ne, cah ye ama ihyan. Che duche rey min, Melquisedec ne, tuhca conahn: “Rey ndah.” Namin dihn va nan che chihquentiyon ye, te yan yahn ye, Salem ne, tuhca conahn: “Yan nan che dihn va.”

³ Ihyan min ne, anduhneca ndete che co man ye, te hua duh devano duh che chaco ye man, duh che chida ye man, nde hua duh devano ti chica ndata yahn ye. Hua duh devano ticuahn chihndeyan ye man, ticuahn chih ye man, ndete che chihno vederihquentiyon yahn ye man. Atihnoca Dihvo vo Jesucristo, Daya Dendiohs, te ndi ye anduhneca chidocuyan ndinan, ne hua cuihno vederihquentiyon yahn ye.

⁴ A ndero ndi te ama yudo vederihquentiyon quenana cuma Melquisedec, te nde ihyan ndico yuhn vo Abraham nevahnecun ye ihyan, ne ndeh nan dehtenduh che chihnevi ye yahn rey chahn, ndahco ye tah ye.

⁵ Nduhca che rihquentiyon ley che dirun Moisés ne, va che cah ihyan naciön yahn Israel ama dehtenduh nan che ndiche queri ama nan dehtenduh yahn ye che va, ndonda tah chidocuyan che ndata yahn Leví. Tihca va che din ye, te ndata yahn Abraham ihyan nduco vih.

⁶ Ate Melquisedec ne, andahre hua ndata yahn Leví ihyan ne, ndonda tah ye dehtenduh che cah

Abraham, ihyān min che çāh Dendiohs ndudo yahn ye ihyān. A Melquisedec che chica ye che conan Dendiohs Abraham,

⁷ ne a devano vo te ihyān che rica ye Dendiohs çava ihyān chenāhn ne, tahque yudo vederihquentiyon quenān cuma ye.

⁸ A ndero ndi che tahque yudo vederihquentiyon che quenān cuma Melquisedec che co vederihquentiyon che chahtenan cuma chidocuyān che ndāta yahn Leví. Ihyān chahn ne, chihno chih ye, ate Melquisedec ne, a ndirun yahn ye nān Ndudo yahn Dendiohs anduhneca ndete che va ca ye.

⁹⁻¹⁰ Leví nduco nducoyaça chidocuyān che ndāta yahn ye ne, anduhneca ndete che nduco ye Abraham, ndeva ye yavenān Melquisedec, te andahre ametah ye ro min, ate Abraham che chihco ndāta ye ihyān.

¹¹ Chidocuyān che ndāta yahn Leví, che namin ndāta yahn Aarón ne, ihyān chahn che chihnde tah ye ley che dirun Moisés, chicuahn ye ihyān nación yahn Israel. Ate nducote hua ndevahn ihyān nduco vederihquentiyon che chahtenan cuma chidocuyān che ndāta yahn Leví ne, quenān cuma che dechuh Dendiohs Dihvo vo Jesucristo, nuhnde tah ye vederihquentiyon nduhça che quenān cuma Melquisedec.

¹² Che ndacorun Dendiohs vederihquentiyon yahn chidocuyān ne, nde ley yahn ye va che ndahco çade ye.

¹³ Tihça, te Dihvo vo Jesucristo ne, ndiyu ndāta yahn chidocuyān ihyān.

¹⁴ A devano cuāco vo te nān ndāta yahn Judá cochi ndāta yahn ye. Namin a devano vo nduhça

che chihquentiyon Moisés che atenan nan ndata yahn Levi quendah chidocuyan.

¹⁵ Nducote nuhnde tah Dihvo vo Jesucristo vederihquentiyon nduhca che quenan cuma Melquisedec ne, a ndero ndi che a ndahco cade Dendiohs ley che dirun Moisés,

¹⁶ te nuhnde tah ye vederihquentiyon min, ndiyu yahn che ndata yahn chidocuyan ihyan, ate yahn che quenan cuma ye vederihquentiyon che hua nda ro che cuihno.

¹⁷ Tihca, te a yahn ihyan min che ndirun nan Ndudo yahn Dendiohs tuhca:

A tendahnun di che co chidocuyan ndinan, cuhnde tah vederihquentiyon nduhca che quenan cuma Melquisedec,

ne hua nda ro che cuihno vederihquentiyon yehn.

¹⁸ Nduco tihca, ndahco cade Dendiohs ley che dirun Moisés, te hua cochihve

¹⁹ cava che ndedevahn ihyan. Menun ley min ne, nda Dihvo vo Jesucristo che tahque ndah vederihquentiyon yahn ye. Ihyan min cochahtino vo ihyan cava che tuno vo nan Dendiohs.

²⁰ Avane ne, cuahn che dechuh Dendiohs Dihvo vo Jesucristo ne, numacuahn vedeyudo cah ye ndudo yahn ye che co ye nduhca chidocuyan ndinan.

²¹ Yahn chidocuyan chenhahn chahn ne, hua tihca cah ye ndudo yahn ye. Cuahn che ndahco ye vederihquentiyon min tah Dihvo vo ne, cah ye ndudo yahn ye che ndirun tuhca:

Dihvo vo Dendiohs ne, numacuahn vedeyudo cah ye ndudo yahn ye, ne va che conahn.

Rahn ye ri ye Daya ye: “A tendahnún di che co chidocuyan ndinan, cuhnde tah vederihquentiyon nduhca che quenan cuma Melquisedec,

ne hua nda ro che cuihno vederihquentiyon yehn.”

²² Nducote a Dihvo vo Jesucristo che nuhnde tah ye vederihquentiyon min ne, conahn ndudo che chihco cade Dendiohs cavo vo. Ndudo min ne, tahque ndah che co ley che chihnde a rahn me.

²³ Chidocuyan chahn ne, yahn ye chahtenan ye nan ntiyon, te nducote ihyan iyehnse ye ne, ca rih ye ca rendacorun ye.

²⁴ Ate Dihvo vo Jesucristo ne, cuhnde tah ye vederihquentiyon min cuahn dama, te hua nda ro che coh ye.

²⁵ Chemin che ihyan che tuno ye nan Dendiohs cava ye ne, ndedevahn ye ihyan, ne ametah conda ye, te va ye cuahn dama, rahn nan ye ihyan nan Dendiohs.

²⁶ Ama chidocuyan nduhca ihyan min che rendotenan vo. Ihyan min ne, ndah ye, ne metah nde ama nunde yahn ye. Hua dama ri ye nduco ihyan nunde. Ndeva Dendiohs yavenan ye, ndeva ye ihyan vahchetero.

²⁷ Chidocuyan ndinan chenahn chahn ne, rendotenan ye che cahno ye ite cuahn dama, co te vedino cava nunde yahn man ye man, nunde yahn ihyan man. Ate Dihvo vo Jesucristo ne, chihco mendahn ye ihyan, chih ye, ne nduco chemin ama yune no nedihve ye nunde yahn ihyan iyehnse.

²⁸ Chidocuyan ndinan chenahn chahn che chihnde tah ye ley che dirun Moisés ne, ihyan nunde ye. Ate cuahn che ndahco cade Dendiohs ley min ne, numacuahn vedeyudo ndahco ye vederihquentiyon tah Daya ye, ihyan min che hua nda ro che condihco ye nunde.

8

Nuhnde tah Dihvo vo Jesucristo vederihquentiyon ra che ndahco cade Dendiohs

¹ Dihvo vo Jesucristo ne, ndi ye nduhca ama chidocuyan che tahque ndinan, rahn nan ye uvo, va ye vahchetero lado tah cuaco Dendiohs. Ndudo cuh che tahque menan vihca van nducuahn che a dirun nan ca ca cuh.

² Chidocuyan che tahque ndinan che chahte ye iyehense ne, chahtenun ye chete yaco che dendah ihyan. Ate Dihvo vo Jesucristo ne, va ye vahchetero. Min ne, ndiyu ihyan iyehense dendah ye.

³ Chidocuyan chahn ne, chenan cuma ye ntiyon che rihco ye ndeh nan vedino nan ta. Ate Dihvo vo Jesucristo ne, chihco mendahn ye ihyan, chi ye vedino cavo vo.

⁴ Ndeté che muhn iyehense quenan Dihvo vo ne, nde hua conan ye nan ntiyon che redin chidocuyan che rihco ye vedino nan ta nduhca che rihquentiyon ley che dirun Moisés, te a ihyan chahn che nda cuande yahn ye ntiyon min.

⁵ Ihyan chahn ne, redin ye ntiyon chete yaco che ndedendah ihyan menun vahchetero nan che va Dendiohs. Devano vo che menun, te cuahn che canan Moisés dendah ye yaco me ne, rahn

Dendiohs, ri ye ihyan: “Cuihque cudado, ne cuedendah nducuahñ nduhca che nahme di tingüete me.”

⁶ Chidocuyañ chahn ne, muhn iyehñse cuh che va ntiyon yahn ye. Ate Dihvo vo Jesucristo che ndi ye anduhñeca chidocuyañ che rahn nan ye uvo nan Dendiohs ne, tahque chahte vederihquentiyan yahn ye che co vederihquentiyan yahn ihyan chahn, te tahque ndah vederihquentiyan che ndahco cade Dendiohs che co vederihquentiyan ndico me man, tahque ndah ndudo che te ye uvo che co ndudo che cah ye ihyan ndico yuhn vo man.

⁷ Vederihquentiyan ndico me ne, hua quendañ ndah, ne chemin che ndaconan ndahco cade ye.

⁸ Nducote ndihchero Dihvo vo Dendiohs che hua redinahñ ihyan vederihquentiyan ndico me ne, rahn ye:

Caviyañ deman ne, ndahco cade ndudo yahn nduco ihyan naciñ yahn Israel man, ihyan naciñ yahn Judá man.

⁹ Ndahco cade ndudo che cah ihyan ndico yahn ye cuahn che chinán ihyan, ndetendañ ihyan naciñ yahn Egipto.

Ihyan chahn ne, hua dinahn ye vederihquentiyan che cah ihyan, ne chemin che chacondañ vedamé ihyan.

¹⁰ Nda ro yahn ne, ndahco cade ndudo yahn nduco ihyan naciñ yahn Israel.

Dín che conahn ye vederihquentiyan yahn, ne hua conañ ye.

Tuhme nedin yahn ihyan, ne ndeva ye yavenañ.

- 11 Nda ro min ne, hua rendotenan che cacuahñ vih ye vañ dihno ye mañ, vañ combiero yahn ye mañ, ça va che tumacadino ye vederihquentiyon yáhn, te tumacadino nducoyaca ihyan, nde ihyan ndico mañ, nde checahya mañ.
- 12 Nchahcó yahn ye, ne ametah ndaconan conun inó nunde yahn ye.
- 13 Nducote raññ Dendiohs che a ndahco cade ye vederihquentiyon yahn ye ne, a devano vo che a chuh ro yahn vederihquentiyon ndico me, a chihcomañ ye.

9

¹ Ihyan ndico yuhn vo ne, chihnde tañ ye vederihquentiyon ndico nañ che ndihco cade Dendiohs nduhça che quenán cuma che ndeva ihyan yavenañ ye. Namin chihnde tañ ye ama yaco che dendah ye.

² Nañ derenda chete yaco me ne, duche Nañ Ta Yudo. Min va candelero mañ, mesa nañ che reta ve pañ che ri vedino mañ.

³ Mendahn chete yaco ne, quendihco ama tino chahte numa chahno. Cuahn candevah vedame tino me ne, duche Nañ Ta Che Tahque Yudo.

⁴ Min va ama nañ ta diyahnguañ nañ che riche cuhn. Namin va ama yave che ndacotuma diyahnguañ. Chete ne, chenun tu rahno nañ che ndirun vederihquentiyon yahn Dendiohs mañ, quenun ama jarro che ndinda nduco diyahnguañ nañ che chenun pañ che duche maná mañ. Namin quenun nducodi che neve, che quenán cuma Aarón.

⁵ Menan yave me ne, a min che nan ta nan che rihnde vedino cava nunde yahn ihyan. Min vattendi o ángel che ndindah ye, ne chendah reche ye. Ama quendihco yudo min, te min riya Dendiohs. Conahn nan vo muhn che rente vo yahn nan ta me.

⁶ Tihca va yan nducuahn chete yaco me, ne chidocuyan chahn ne, renda ye cuahn dama nan ta nan derenda me, redinahn ye ntiyon che chenancuma ye.

⁷ Ate Nan Ta che Tahque Yudo me ne, atenan chidocuyan che tahque ndinan me renda ye ama yune no che ama nduyo. Queri ama yune che conda ye ne, va che quenda ye yun yahn ite cava che co vedino yahn nunde yahn man ye man, nunde yahn nducoyaca ihyan man.

⁸ Nduco chemin ne, rete Vaco Ndah yahn Dendiohs, recadino vo te numanahn che va ca vederihquentiyon ndico me ne, nduhca che quendihcokino mendahn chete yaco, ne hua co conda adecoduhno ihyan Nan Ta Che Tahque Yudo me ne, tihca hua co tuno ihyan vahchetero.

⁹ Yahn tino che quendihco chete yaco ne, a ndero ndi che rihco vih ihyan nan Dendiohs ro min cuahn che va ca vederihquentiyon ndico me. Nde ama nan dehtenduh vedino che recah ihyan Dendiohs ro min ne, hua co din che cuahtemanino ye.

¹⁰ Vederihquentiyon min ne, chihnde cava che co devano ihyan dehtenduh che co cheh ye man, cuh ye man, taca che nano ye tah ye man, dehtenduh yahn ye man, ne chengu nde dechuh Dendiohs Dihvo vo Jesucristo, ndahco cade ye.

¹¹ Cuahn che nda Dihvo vo ne, ndi ye nduhca ama chidocuyan che tahque ndinan, nda ye vederihquentiyon ra che tahque ndah. Chihno min ne, conahn ye vahchetero. Chidocuyan che tahque ndinan chahn che chihnde tah ye vederihquentiyon ndico me ne, din ye ntiyon chete yaco che ihyan dendah ye. Ate Dihvo vo Jesucristo ne, vahchetero va Ye.

¹² Chidocuyan che tahque ndinan chahn ne, nduyo nduyo rendotenan ye yun yahn chivato man, itenine cahya man, cava che co vedino yahn nunde yahn ihyan. Ate Dihvo vo Jesucristo ne, chihco mendahn ye ihyan, ne nduco yun yahn man ye nedihve ye nunde yuhn vo. Ama yune no ndedevahn ye uvo, conahn ye vahchetero nan Dendiohs.

¹³ Nan vederihquentiyon ndico me ne, richihve yun yahn chivato man, itenine man iya yahn itenine che ndihquiyahn ye ite man, cava che co vedino, ne cuhndeman ino ihyan che cahnda yahn ye che conda ye chete yaco.

¹⁴ Ate nde tahque richihve yun yahn Dihvo vo Jesucristo, ihyan min che metah nde ama nunde yahn ye. Ihyan min ne, numacuahn vederihquentiyon yahn Vaco Ndah yahn Dendiohs, chihco mendahn ye ihyan, chih ye cava che ndaco vo vederenchahco yahn nunde yuhn vo, ndevahn vo. Man ne, hua dehve rahco vo, redinahn vo vederihquentiyon yahn Dendiohs, ihyan min che va ye vahchetero.

¹⁵ Nducote chih Dihvo vo Jesucristo, chera yun yahn ye ne, va tah ye vederihquentiyon ra, rahn nan ye uvo nan Dendiohs. Chemin che ihyan

che a tendahnun Dendiohs ne, cuahtenan ye vahchetero numacuahn ro nduhca che cah Dendiohs ndudo yahn ye. Nducote chih Dihvo vo ne, ndedevahn ye uvo, te cava ihyan min nchahco Dendiohs nunde yuhn vo che hua dinahn vo vederihquentiyon yahn ye che chihnde ro menan.

¹⁶ Testamento che rihco ihyan ne, ndete che nuhnde cuaco che a chih ye ne, conahn.

¹⁷ Ate ndete che va ca ye ne, hua co conahn.

¹⁸ Vederihquentiyon che rihco cade Dendiohs ne, va che cora yun cava che conahn.

¹⁹ Chemin che cuahn che chihno cahndudo Moisés vederihquentiyon che cah Dendiohs ihyan, chihnevan nducoyaca ihyan yan ne, chetah ye ama tihve yudo yahn itecuche che necah cuah nduco ama ticua yata che duche hisopo, ne decahnda ye nduco yun yahn itenine cahya man, yun yahn chivato man, che ndihchetahn nduco nune. Tuhme cahnan ye yun me nan libro che ndirun vederihquentiyon min man, chinun ye van nducoyaca ihyan man,

²⁰ ne rahn ye: “Nduco yun cuh, conahn vederihquentiyon yahn Dendiohs che te ye uvo.”

²¹ Namin cahnan ye yun me chete yaco man, nan dehtenduh che va min man.

²² Nan vederihquentiyon yahn Dendiohs che dirun Moisés ne, a nahn nducuahn dehtenduh va che co vihco nduco yun yahn ite. Namin va che coh ite, cora yun yahn te cava che nchahco Dendiohs nunde yahn ihyan.

Chih Dihvo vo Jesucristo cava nunde yuhn vo

23 Yaco nan che chihnde vederihquentiyon ndico min ne, chihnde menun vahchetero. Ndeucuahn dehtenduh che va chete yaco min ne, rendotenan yun yahn ite cava che co vihco. Ate cava che tuno vo vahchetero nan va Dendiohs ne, hua cochihve yun yahn ite.

24 Chidocuyan ndinan chahn ne, atenan chete yaco min chihnde vederihquentiyon yahn ye. Ate tahque yudo vederihquentiyon yahn Dihvo vo Jesucristo, te vahchetero va ye, rahn van ye uvo nan Dendiohs.

25 Chidocuyan chahn ne, nduyo nduyo renda ye Nan Ta Che Tahque Yudo, ne rendotenan ye yun yahn ite cava che co vedino. Ate Dihvo vo Jesucristo ne, ama yune no chih ye, chera yun yahn ye cava nunde yuhn vo.

26 Nde nan canan iyehnse ne, ama yahn ite quenanama che chihno ihyan ndico yuhn vo, chi te vedino. Ate ndaro che ndahco cade Dendiohs vederihquentiyon yahn ye ne, ndaro Dihvo vo Jesucristo, chihco mendahn ye ihyan, chih ye ama yune no, cava che nchahco Dendiohs nunde yuhn vo.

27 Nducoyaca ihyan iyehnse ne, a nihnde cade che va che coh ye. Adiva ne, va che techcade Dendiohs yahn ye.

28 Dihvo vo Jesucristo ne, chih ye ama yune no, nedihve ye nunde yahn ama yahn ihyan. Ndaro yahn ne, ndaconan chi tun ye, ndiyu cava che coh ye tama yune cava nunde, ate cava che ndeva ye ihyan che numa ino ye chenan rino ye ihyan.

10

¹ Vederihquentiyon che ndahco çade Dendiohs ne, tahque ndah che co vederihquentiyon che chihnde tah Moisés. Nan vederihquentiyon ndico me ne, hua tuno ihyan nan Dendiohs, andahre nduyo nduyo recah ye vedino çava nunde yahn ye.

² Ndete che ndaca ihyan chahn vederenchahco çava nunde yahn ye ama yune no ne, ametah rendotenan che ndaconan çah ye vedino. Ate hua nchahco Dendiohs nunde yahn ye ama yune no, ne chemin che hua rihndeman ino ye, redin nunde yahn ye.

³ Nduyo nduyo che recah ye vedino ne, renecaçhco ye che chendihco ye nunde,

⁴ te yun yahn itenine man, yun yahn chivato man ne, hua co din che ama yune no ndaca ihyan vederenchahco çava nunde yahn ye.

⁵ Chemin che cuahn che nda Dihvo vo Jesucristo iyehñse ne, rahn ye ri ye Dendiohs:

Hua renan ino ne che rihno ihyan ite, ri te vedino nan ne.

Tahque ndah ne ne, din ne che ndó nduhça ama ihyan iyehñse, çahco mendahn u cóh, nedi-hvé nunde yahn ihyan.

⁶ Hua renan ino ne che rihno ye ite, rihquiyahn ye ite, ri te vedino çava che nchahco ne nunde yahn ye.

⁷ Dendiohs yahn, nducote hua renan ino ne deht-enduh vedino chemin chan ne, a ndá muhn iyehñse çava che dinahn che rihquentiyon ne nduhça che a ndirun yahn nan Ndudo yahn ne.

⁸ Dinoca raħn Dihvo vo Jesucristo che hua renan ino Dendiohs dehtenduh vedino che recaħ ihyan caħa nunde yahn ye andahre naħ vederihquentiyon ndico a nihnde caħe che va che caħ ye.

⁹ Tuhme raħn ye: “A ndá muhn iyehanse caħa che dináħn che rihquentiyon ne.” Nduco che tiħca raħn ye ne, chihco ro ye che a nuħnde caħe vederihquentiyon ndico me, te chihco mendáħn ye ihyan menun vedino che recaħ ihyan ro menaħ.

¹⁰ Naħ vederihquentiyon che ndaħco caħe Dendiohs ne, nchaħco ye nunde yuhn vo yahn che chihco mendáħn Dihvo vo Jesucristo ihyan, chih ye aħa yune no, ndedevahn ye uvo.

¹¹ Naħ vederihquentiyon ndico me ne, va che caħco chidocuyaħ chahn vedino ro ro, ate vedino chemin chan ne, hua redin che ndaħca ihyan vederenchaħco caħa nunde yahn ye aħa yune no.

¹² Ate Dihvo vo Jesucristo ne, chih ye, nedihve ye nunde yuhn vo aħa yune no. Chihno min ne, conaħn ye vahchetero, chihnde ye laħo taħ cuaħco Dendiohs.

¹³ Min quenán rino ye nde nda ro che ndaħco ndiya Dendiohs ihyan che hua ri rendihche ye ihyan, nevahnecun ye ihyan.

¹⁴ Ihyan min ne, aħa yune no ndedevahn ye ihyan yahn ye, chihco mendáħn ye ihyan, chih ye caħa ye.

¹⁵ Cuaħco chemin, te namin din Vaco Ndaħ yahn Dendiohs che dirun ihyan profeta tuhca:

¹⁶ Raħn Dihvo vo Dendiohs: “Nda ro yahn ne, ndaħco caħe ndudo yaħn nduco ihyan yaħn. Dín che conaħn ye vederihquentiyon yaħn, ne hua conaħn ye.”

17 Namin rahn ye:

Nchahcó yahn ye, ne ametah ndaconan conun inó nunde yahn ye.

18 Cuahn che a nchahco Dendiohs nunde yahn ihyan ne, ametah rendotenan che cah ca ye vedino.

Nahn che cochahtino vo Dendiohs

19 Dihno, nan vederihquentiyon ndico me ne, nde ama ihyan yan hua co nda ye Nan Ta Che Tahque Yudo. Ate nan vederihquentiyon ra ne, nducote a chih Dihvo vo Jesucristo, chera yun yahn ye, nedihve ye nunde yuhn vo ne, hua dehve rahco vo, co tuno vo vahchetero nan Dendiohs.

20 Nan vederihquentiyon ndico me ne, quendi-hco tino me chete yaco cava che hua chuh ihyan, nda ye Nan Ta Che Tahque Yudo me. Ate nan vederihquentiyon ra che va tah Dihvo vo Jesucristo ne, co tuno vo vahchetero nan Dendiohs, te chihco mendahn ye ihyan, chih ye cavo vo.

21 Nducote ndi Dihvo vo Jesucristo nduhca ama chidocuyan che tahque ndinan, rahn nan ye uvo ihyan yahn Dendiohs ne,

22 chemin che ndahco vo chedave yuhn vo tah Dendiohs. Hua dehve rahco vo, te ritahno vo Dihvo vo Jesucristo numa ino vo. A ndaco vo vderenchahco cava nunde yuhn vo. A chedenune vo, ne man ne, anduhneca ndete che a ndo dave vo nduco nune dave.

23 Quendi vo numa ino vo cochahtino vo che ndeva Dendiohs uvo, te dinahn ye ndudo yahn ye che te ye uvo.

24 Nahn che necah yan ama tamo vo chedave yahn vih cava che quendi vo din yahino vih vo man, din vo che ndah man.

25 Hua cahcoman vo che rendo damo vo nduco vih nduhca che redin nahn dihno vo che rihcoman ye. Tahque ndah ne, quendi vo nde tahque numa ino vo necah yan ama tamo vo chedave yahn vih, te a cochi nino ro che ndaconan chi Dihvo vo Jesucristo.

26 Ndete che a chenahn vo ndudo ndah yahn Dendiohs, ne cuahcotahn vo ne, tuhme ametah nchahco ye yuhn vo. Ndete che cuahcotahn vo ne, metah nguahco yuhn vo che chih Dihvo vo Jesucristo.

27 Hua co cuahteman ino vo, te va che cuhnde cade yuhn vo, co vo castigo yah van ruchiyahn dama nduco ihyan che hua ri rendihche ye Dendiohs.

28 Nducoyaca ihyan che rahcotahn ye yahn vederihquentiyon che dirun Moisés ne, ndete che ndahco cuaco o ino ihyan nunde yahn ye ne, va che cahno ihyan yan ihyan, ametah vederenchahco cava ye.

29 Ihyan che a chenahn ye Ndudo yahn Dendiohs ne, ndete che cuacondah vedame ye Daya Dendiohs man, ndete che duche rino ye vederihquentiyon yahn Dendiohs che chih Daya ye, chera yun yahn ye cava che ndedevahn ye ihyan iyehanse man, ndete che cuahcotahn ye yahn Vaco Ndah yahn Dendiohs, ihyan min che yahino ye ihyan man ne, tuhme tahque chahte castigo va che co ye che co ihyan chahn.

30 Ihyan che tihca redin ye ne, hua co ndevahn

ye, te ra_hn Dendiohs: “U dín castigo ihyan nunde, nda_hco menún yahn ye.” Namin ra_hn ye: “Ihyan ya_hn ne, u che Dihve ye. U techeca_dé yahn ye.”

³¹ ¡A_ma ca_hnda yuhn vo che cuahtendi_hco vo nunde na_n Dendiohs, ihyan min che va ye vahchetero!

³² Cueneca_hco nchuhn cuahn che cade chihnevan ne ndudo nda_h yahn Dihvo vo Jesucristo, chitahno ne ihyan. A_ma quenda_h ne vedechahtino che a_ma dín ta_n ihyan nduco ne.

³³ Na_hn cua_n ne, dín du_hche yahn ye nchuhn, chahn ye nchuhn na_n nducoya_{ca} ihyan. Na_hn cua_n ne, a_ma chi ra_n ne che chahn ihyan combiero yahn ne che nduco ne ma_n,

³⁴ dín ne vedeva_hhino nduco combiero yahn ne che chahtenun ye va_{co}ya_hn ma_n. Dín chahtino ne, nde hua chi ra_n ne yahn che chehnevinan ihyan dehtenduh yahn ne, te a devano ne che nuhnde menun yahn ne vahchetero dehtenduh che nde tahque nda_h, che ngu cuahn da_ma.

³⁵ Chemin che nahn che quendi ne cochahtino ne. A devano ne che nda_hco menun nda_hva Dendiohs yahn ne.

³⁶ Nahn che cuahtenan cuma ne vedechahtino ca_{va} che dinahn ne vederihquentiyon yahn ye, ne ndeva ye nchuhn nduhca_h che te ye ndudo yahn ye.

³⁷ Na_n Ndudo yahn ye ne, a ndirun tuhca_h:
A nun cuahn nda_h ihyan min che a va ca_de che chi ye. Ameta_h condah ye.

³⁸ Ihyan che ritahno ye u ne, nedin ya_hn ihyan.
Va che quendi ye cochahtino ye u, te ndete che ca_hcoma_n ye u ne, cuaconda_h vedame_h ihyan.

³⁹ Uvo ne, ritahno vo Dendiohs, ne chemin che ndichahtino vo che ndeva ye uvo. Hua dama co vo nduco ihyan che racondah vedame ye Dendiohs, ne rinda ye.

11

Nduhca che ritahno ihyan Dendiohs

¹ Che ritahno vo che ndeva Dendiohs uvo ne, chenan ino vo che va che conahn. Andahre condah conahn, ate nducote ritahno vo ihyan ne, a devano vo te va che conahn.

² Tihca, te ihyan ndico yuhn vo ne, nedin yahn Dendiohs ihyan yahn che chitahno ye ihyan.

³ Nducote ritahno vo Dendiohs ne, a devano vo te man ye dendah ye iyehense. Andahre metah dehva ro menan, ate chihquentiyon no ye, ne chihnde ro.

⁴ Abel ne, chitahno se Dendiohs, ne chemin che cah se ihyan ama vedino che tahque ndah che co che cah Cain. Nducote chitahno se ihyan ne, nedin yahn ye sahn, nevah necun ye vedino yahn se. Sahn min ne, a ndih se, ate nducote chitahno se Dendiohs ne, nde meniyon rethyon yune se uvo che cotahno vo Dendiohs nduhca che chitahno se.

⁵ Enoc ne, chitahno ye Dendiohs, ne chemin che ndeva ye ihyan vahchetero dequenduche ye. Ametah ndaca ndihchero ihyan iyehense ihyan. Nan Ndudo yahn Dendiohs ne, a ndirun yahn Enoc, che cuahn che quenan ye iyehense ne, ndahca quenan ye nan Dendiohs, ne nedin yahn Dendiohs ihyan.

⁶ Cava che tuno vo nan Dendiohs ne, va che cotahno vo ihyan, te ihyan che ritahno ye che va

ye maṅ, che rah ye ihyan maṅ ne, atenaṅ ihyan chahn che rendeva ye ihyan.

⁷ Noé ne, chitahno ye Dendiohs, ne chemin che dinahn ye, dendah ye arca me cuahn che caḥn Dendiohs chi ye ihyan che va che ndedetoh ye iyehñse. Chete arca me quenun ye nduco ihyan yahn ye, ndevahn ye. Nducote chitahno ye ndudo min yahn dehtenduh che comān cochi che co ne, chihco ro ye che ihyan nunde ne, a ndinda ye yahn che hua chitahno ye. Namin nducote chitahno ye ne, nedin yahn Dendiohs ihyan.

⁸ Abraham ne, nducote chitahno ye Dendiohs ne, dinahn ye cuahn che yaḥve ye ihyan che caḥn ye yaḥn yahn ṅaṅ che caḥ ye ihyan. Andahre nde hua devano ye ti quenda Dendiohs ihyan, ate chihcomān ye yaṅ vaço ye, cuahn ye.

⁹ Nducote chitahno ye Dendiohs ne, quenun ye yaḥn min, andahre tama nación. Quenun ye vah tiño nduhca ihyan chenun ye yune. Tihca quendi Isaac maṅ, Jacobo maṅ, che namin nduco ye caḥ Dendiohs ndudo yahn ye ihyan.

¹⁰ Tihca din Abraham, te quenun rino ye che ndeva Dendiohs ihyan vahchetero, ṅaṅ che ama ndaḥca, ṅaṅ che maṅ Dendiohs dendah ye.

¹¹ Namin ihyan ndaḥta yahn ye Sara ne, chitahno ye Dendiohs, ne andahre indihnte cuahn ye, ate chichahtino ye che conahn ndudo yahn Dendiohs, ne chemin che ndaça ama daya ye nduhca che caḥ Dendiohs ndudo yahn ye ihyan.

¹² Min quendinan che ama chi yaḥn ndata yahn Abraham, andahre a indihnte cuahn ye ro min. Nduhca che ndeh iyon che chenun ṅaṅ ro maṅ, nduhca che ndeh yaḥndute che chetaḥve chihto

nuniyahñ man, che nde hua cocha vo din ducho vo ne, tihcã ama chi yahñ ndata yahñ ye.

¹³ Nducoyaca ihyan ndico chahn ne, chih ye. Numanahn che chahtenan ca ye iyehñse ne, hua chenahñ chinahn nduco ye nducuahn dehtenduh che cah Dendiohs ndudo yahñ ye ihyan. Ate chichahtino ye che va che conahn nducuahn, ne chi yeno ye, te a devano ye te ndiyu iyehñse cuh va che cuahtenan ye cuahn dama. Redin ye cuande che anduhñeca ihyan chenun yune ye, te a devano ye che neve ro no cuahtenan ye iyehñse, tuhme ndeva Dendiohs ihyan.

¹⁴ Nducote redin ye cuande che anduhñeca ihyan chenun yune ye ne, rihco ro ye che chenahñ ino ye che cuahtenan ye vahchetero.

¹⁵ Ndete che ndedecadino ye yahñ yan vaco ye che chihcomañ ye ne, a ndaconan ca ye.

¹⁶ Ate hua tihcã din ye, te tahque ndah ye ne, chahtenan ino ye che nda ye vahchetero. Chemin che nedin yahñ Dendiohs ihyan numa ino ye, ne chihco yan ye vahchetero cava ye.

¹⁷⁻¹⁸ Cuahn che ndihchenahñ Dendiohs Abraham ne, nducote chitahno Abraham ihyan ne, dinahn ye yahñ ye, ne quenda ye daya ye Isaac cava che cahno ye sahn, co se vedino nduhca che chihquenti-yon ye. Ama ndiyahñ ra sahn min yahñ ye, ate a chihquino ye che cahno ye sahn, andahre a necah Dendiohs ndudo yahñ ye ihyan che a sahn min cahco ndata se ndata yahñ ye.

¹⁹ A devano ye te Dendiohs ne, nde tenahn ri rendedetuhche ye. Che lado yahñ Abraham ne, anduhñeca ndete che ntuche se van tenahn, te a va che coh se che rahco ye.

²⁰ Isaac ne, chitahno ye Dendiohs, ne chemin che chica ye ihyan che conan ye daya ye Jacob man, Esaú man, din ye che ndahca cuahtenan se.

²¹ Jacob ne, chitahno ye Dendiohs, ne chemin che cuahn che a nda nino ro che coh ye ne, chica ye ihyan che conan ye queri ama daya José, din ye che ndahca cuahtenan se. Chihno min ne, quendih ndudo ye indahco yahn ye, ndeva ye yavenan Dendiohs.

²² José ne, chitahno ye Dendiohs, ne chemin che, cuahn che nda nino ro che coh ye ne, rahn ye ri ye ihyan nación yahn ye Israel, che adiva ne, va che ndaca ye nación yahn Egipto. Namin chihquentiyon ye ihyan chahn che nda ro min ne, ndiquenda ye ine yahn ye.

²³ Indihte yahn Moisés ne, chitahno ye Dendiohs, ne chemin che cuahn che chihndeyan Moisés ne, tihyon ndeh ye sahn ino iyo. Chichahtino ye Dendiohs che ndedevahn ye sahn cava che hua cahno sandado sahn nduhca che ndihquentiyon rey yahn Egipto, te ndihchero ye che ama ndahca se.

²⁴ Moisés ne, chitahno ye Dendiohs, ne chemin che cuahn che a chi man ihyan ye ne, tehche ino ye tahn daya rey me che din daya te ihyan.

²⁵ Ndotenan che quendi ye vedeyeno yahn man ye numanahn che quenan ye iyehense, condihco ye nunde ne, quenan ino ye, ndo nduco ye ihyan yahn Dendiohs, chuhrihn ye nduco vih.

²⁶ Tahque ndah ye ne, chihcoman ye nducuahn vedecuihca che va nación yahn Egipto, ne numacuahn vedeyeno chuhrihn ye, din tan ihyan nduco ye nduhca che din tan ihyan nduco Dihvo

vo Jesucristo. Tihca din ye, te chichahtino ye Dendiohs che ndahco menun ye yahn ye.

²⁷ Nducote chitahno ye Dendiohs ne, andahre ama tan rey me, ate nde hua din vah ye ihyan, chica ye naci3n yahn Egipto. Tihca din ye, te din chahtino ye Dendiohs, ihyan min che va ye vahchetero.

²⁸ Nducote chitahno ye Dendiohs ne, din ye vihco ro yudo, ne chihquentiyon ye ihyan naci3n yahn Israel che cahnan ye yun yahn itecuche cahya nan yahn yahn chendevah vaco ye, cava che, cuahn che dechuh Dendiohs 3ngel me ne, ndihchero ye, ne hua cahno ye daya ye che menan.

²⁹ Ihyan naci3n yahn Israel ne, chitahno ye Dendiohs, ne chemin che chi chuh ye menda3n Nuniyah Cuah anduhneca che chuh ye nan yahn cuma. Ate cuahn che chuh sandado yahn Egipto che ndah se ihyan chahn ne, chendih nune sahn, chanorine se.

³⁰ Adiva ne, nducote chitahno ihyan chahn Dendiohs ne, chihno ndache ro che chacondutonan ye chete yahn yan Jeric3 ne, ndora.

³¹ Rahab, ama ndahta che ndere quechica te ro menan ne, chitahno te Dendiohs, ne nevahneacun te sandado yahn naci3n yahn Israel che vatechica se rendihchero ndudo se. Chemin che ndevahn te, hua chih te dama nduco ihyan che chahcotahn ye yahn Dendiohs.

³² Ama yahn ca ihyan che chitahno ye Dendiohs, co nte vo yahn ye. Ate cava che hua nduh condah yuhn vo ne, atenan tama te o ye ntihton yan ihyan, nduhca Gede3n man, Barac man, Sans3n

man, Jefe man, David man, Samuel man, ihyan profeta chenhahn man.

³³ Ihyan chahn ne, nducote chitahno ye Dendiohs ne, nahhn ye ne, ndahco ndiya ye ndeh naci6n. Nahhn ye ne, ndahca chihquentiyon ye. Nahhn ye ne, chinan Dendiohs ihyan nduhca che cah ye ndudo yahn ye ihyan. Nahhn ye ne, cuahn che tahn nun ye le6n ne, ndedevahn Dendiohs ihyan, hua cheh te ihyan.

³⁴ Nahhn ye ne, ndedevahn Dendiohs ihyan van ruchiyahn, ne hua chiche ye. Nahhn ye ne, ndedevahn Dendiohs ihyan tin espada, ne hua dehva chi yahn ye. Nahhn ye ne, andahre hua dito ye, cah dito Dendiohs ihyan. Nahhn ye ne, chinan Dendiohs ihyan van canda, ne ndahco ndiya ye sahn che ruhn se nduco ye.

³⁵ Namin nahhn ihyan ndahta, ndedetuhche Dendiohs tenahn yahn ye.

Nahn ye, andahre cah rihn sahn nunde ihyan, chihno se ihyan, ate hua chacondah vedame ye Dendiohs, te chenan ino ye che ndeva ye ihyan, cuahtenan ye vahchetero.

³⁶ Nahhn ye ne, din duche yahn se ihyan man, chahn se ihyan man, chiquiyahto se cadena ihyan man, chih se ihyan vacoyahn man.

³⁷ Nahhn ye ne, chihno se ihyan nduco tu. Nahhn ye ne, chihca mahhn se ihyan. Nahhn ye ne, tumarande se ihyan. Nahhn ye ne, chihno se ihyan nduco espada. Nahhn ye ne, chahtechica muhn chahtechica min ye, atenan dima itecuche man, chivato man, chahtenun ye. Chahtechica ye vedevah vedecheh, din tan ihyan nduco ye.

³⁸ Rahtenan muhn rahtenan min ye, yahn nan

che metah duhva mañ, vañ icoyahn mañ, iveyava mañ, dutiyahn mañ. Nducoyaça ihyan chahn ne, che ça va ihyan nunde ne, nde hua redin yahn che tihça chuhrihn ye, chahtechica ye.

³⁹ Nducoyaça ihyan chahn ne, andahre nedin yahn Dendiohs ihyan yahn che chitahno ye ihyan, ate metah conan conahn nduco ye nducuahn che necah ye ndudo yahn ye ihyan,

⁴⁰ te a ndihco çade ye che cuahtenan rino ihyan chahn nde nda ro che dama ndeva ye uvo nduco ye vahchetero.

12

Cochahtino vo Dihvo vo Jesucristo

¹ Nducote ama yahn ihyan chahn chitahno ye Dendiohs, chihco ro ye vañ vo nduhça che chitahno ye ne, chemin che nahn che nuhn ino vo, çahcomañ vo che rahtechico vo vedeyeno yahn mañ vo, rahtendihco vo nunde, ne nduhça sahn che numa ino se rano se çade, nde ñañ che quendaññan se, tuno se ñañ yahn çade ne, tihça quendi vo numacuahn vedechahtino, dinahn vo che nahn Dendiohs.

² Nahn che cochahtino vo Dihvo vo Jesucristo, ihyan min che tihyon yune ye uvo che chitahno vo Dendiohs mañ, din ye che tuno vo ñañ ye mañ. Ihyan min ne, chihco mendañ ye ihyan, quenah yah ye ñañ cruz. Hua tumaçah ye andahre ama chuhrihn ye, ne numacuahn vedecuihno chih ye, te a devano ye te cuihno min ne, ama co yeno ye. Mañ ne, va ye vahchetero, lado tah cuaco Dendiohs.

³ Condedecadino nchuhn nduhc̄a che am̄a chuhrihn Dihvo vo Jesucristo, din t̄an ihyan nunde nduco ye c̄ava che quendi ne yune yahn ye, ne hua co doh ino ne m̄an, c̄ava che hua cahcom̄an ne m̄an.

⁴ Dehve rahco ne, andahre am̄a rechuhrihn ne, redin t̄an ihyan nunde nduco ne, ate vate ca dihno vo che nde tahque rechuhrihn ye, nde rihno ihyan nunde ihyan.

⁵ A devano ne nduhc̄a che rah̄n Dendiohs, ndirun n̄an Ndudo yahn ye tuhc̄a:

Dayá, u che Dihve nchuhn, redín castigo nchuhn c̄ava che ndah yahn ne.

Cuenevah̄necun ne. Hua co nd̄ache ne.

⁶ A devano ne te ihyan che a nedin dayá ihyan, che yahinó ihyan ne, a ihyan chahn che redín castigo ihyan c̄ava che ndah yahn ye.

⁷ Codin chahtino ne yahn che redin Dendiohs castigo nchuhn, te rendihche ye nchuhn nduhc̄a daȳa ye, ne a c̄ava che ndah yahn ne che tihc̄a redin ye. A devano vo te nducoȳaca ihyan redin ye castigo daȳa ye c̄ava che ndah yahn.

⁸ Ihyan che hua redin Dendiohs castigo ihyan nduhc̄a che redin ye castigo nducoȳaca daȳa ye c̄ava che ndah yahn ne, ihyan chahn che hua redin yahn ye ihyan.

⁹ Cuahn che t̄ave indih̄te yuhn vo uvo ne, din ye castigo uvo c̄ava che ndah yuhn vo. Nducote nevah̄necun vo ihyan ne, nde tahque redin yahn che nevah̄necun vo Chido vo che va ye vahchetero, che redin ye castigo uvo c̄ava che ndahc̄a cuahtenan vo.

¹⁰ Cuahn che checahya uvo ne, din indihthe yuhn vo castigo uvo cava che ndah yuhn vo anduhneva che tuno vederendedecadino yahn ye. Ate tahque ndah ro yuhn vo che redin Dendiohs castigo uvo, te nahn ye che ndah ihyan co vo nduhca che ndah man ye.

¹¹ Cuahn che redin Dendiohs castigo uvo ne, hua renan ino vo, te ama rechuhrihn vo. Ate cuahn che tuma cuahn vo castigo yahn ye ne, ama cochihve yuhn vo cava che runecade cuahtechico vo, cuahte dihn chedave yuhn vo.

Ama cahnda che cuahcotahn vo yahn Ndudo yahn Dendiohs

¹² Nducote ama richihve castigo che redin Dendiohs uvo ne, chemin che cuenecah yan nchuhn chedave yahn ne, hua co ran ne.

¹³ Codin ne cuande, ne numa ino ne runecade cuahtechica ne cava che cua cuande ihyan che ndache ino ye, ne necah yan ye chedave yahn ye, quendi ye yune yahn ne.

¹⁴ Codin nchuhn cuande, ne runecade cuahtechica ne, hua cuahte canda ne nduco ihyan. Tihca, te ihyan che hua runecade ye ne, hua tuno ye nan Dihvo vo Dendiohs.

¹⁵ Nducoyaca nchuhn ne, cuihco ne cudado cava che quendi Dendiohs din yahino ye nchuhn. Hua ndihche tan ne vih, detohnan ne chedave yahn man ne man, ihyan chenahn man.

¹⁶ Hua cuahtenan nde ama nchuhn nduco ihyan che hua nihnevaco nduco ne. Nde hua tehche tah ne che ndah yahn ne, nduhca che din Esaú, che nduco tahsihn comida chahcorun se ndudo ndah

che va che çahco chida se çava se yahn che sahn menan se.

¹⁷ A devano ne te cuahn che nda ro che çahco chida se ndudo ndah çava se ne, hua ndaca se andahre ama chaco se, te a nthcue se.

¹⁸ Ihyan ndico yuhn vo ne, ndere chuhrihn ye, chahn ye tingüete me, quenán ye canedihya. Min ne, ama chiche man, ama chi man man, ama chi yudo man.

¹⁹ Chihnevan ye che tive corneta man, che nte Dendiohs nduco ye man, ne nducote ama yudo ndudo yahn ye ne, chica ye favor ihyan che metah quendi ye çahma ye.

²⁰ Dihya ihyan chahn chi yahn che ama chihco yudo Dendiohs tingüete me, te chihquentiyon ye che andahre ama ite che çahn nda te min ne, va che çahno ihyan ite nduco tu, o nduco lanza.

²¹ Ama yudo chi min, che nde man Moisés ne, ama dihya ye chi, nde tuno rendoh ye che vah ye.

²² Ate uvo ne, tahque ndah ro yuhn vo, te ndotenan che cuhn vo tingüete me ne, tuno vo vahchetero nan va Dendiohs, ihyan min che ama yudo vederihquentiyon yahn ye. Min chenán çade mil ángel, rendeva ye yavenan ye numacuahn vedeyeno.

²³ Uvo ne, a ndi cuande vo vahchetero, ne va che ndo damo vo nduco nducoyaça ihyan yahn Dendiohs che vate ye min. Uvo ne, ndichahtino vo Dendiohs, ihyan min che techecaçe ye yahn nducoyaça ihyan nunde.

²⁴ Namin ndichahtino vo Dihvo vo Jesucristo, ihyan min che a va tah ye vederihquentiyon ra, rahn nan ye uvo nan Dendiohs. Ihyan min ne,

chihco mendahn ye ihyan, chera yun yahn ye cava che nchahco Dendiohs nunde yuhn vo. A devano vo te namin chera yun yahn Abel, ate hua chichihve cava nde ama ihyan.

²⁵ Cuihco nchuhn cuidado, ne hua cuahcotahn ne yahn Dendiohs, ihyan min che va ye vahchetero, che riyahve ye nchuhn. Nducote hua ndevahn ihyan ndico yuhn vo che chahcotahn ye yahn ye ro che yahve ye ihyan tingüete me ne, tahque uvo ne, hua ndevahn vo ndete che cuacondah vedamo vo ihyan.

²⁶ Ro min che yahve ye ihyan chahn ne, nde yahn nuhn. Tahque man ne, nde tahque yudo, te rahn ye: “Tama yune ne, ndiyu deman yahn din che nuhn, te namin nde nducuahn che chenan nan ro din che nuhn.”

²⁷ Nducote rahn ye che “tama yune” ne, a devano vo te ndedetoh ye nducuahn dehtenduh che va che cuihno, ne nuhnde deman dehtenduh che a nihnde cade che hua cuihno.

²⁸ Chemin che necah vo nundihve cuahn Dendiohs, te vederihquentiyon che te ye uvo ne, hua nda ro che cuihno. Ndeva vo yavenan ye numacuahn chedave yuhn vo nduhca che renan ino ye.

²⁹ Tihca, te Dendiohs yuhn vo ne, ama yudo vederihquentiyon yahn ye nduhca yahn che redin che rendo iya dehtenduh.

13

Nduhca che nahn Dendiohs che cuahtechico vo

¹ Cuiquendi nchuhn din yahino ne ama tama ne vih.

² Cuenevahne^{cun} ne ihyan chenun yune che nda^{ye} ndevaco^{ne}, te van^{ihyan} che renevahne^{cun} ye ihyan chenun yune ndevaco^{ye} ne, chahte ihyan che nevahne^{cun} ye nde ángel andahre nde hua tumacadino ye.

³ Conan vahino^{ne} ihyan che chenun ye vacoyahn^{anduhneca} ndete che man^{ne} chenun ne vacoyahn. Conan vahino^{ne} ihyan che rechuhrihn^{ye}, redin tan^{ihyan} nduco^{ye}, te namin nchuhn^{ne}, iyehse vate^{ne}.

⁴ Nducoyaca^{nchuhn} che nihnevaco^{ne} ne, hua ndere cuahtechica^{ne} nduco^{ihyan} che hua nihnevaco^{nduco} ne, te Dendiohs^{ne}, din^{ye} castigo^{nducoyaca} ihyan che ndere rahtechica^{ye} nduco^{ihyan} che hua nihnevaco^{nduco} ye man, nducoyaca^{ihyan} che redin duche yahn^{ye} che a nihnevaco^{ye} man.

⁵ Hua cuahcoran^{nchuhn} cava^{tume}. Cuahtenan^{ne} vedeyeno^{nduco} che a va yahn^{ne}, te rahn^{Dendiohs}: “Hua cahcoman^{nchuhn}, nde hua cuacondah^{vedame} nchuhn.”

⁶ Chemin^{che} nahn^{che} cochantino^{vo} ihyan nduhca^{che} chichantino^{ihyan} ndico yuhn^{vo} che dirun^{ye} tuhca:

Dihvé Dendiohs^{ne}, a ihyan min^{che} rinan^{ye} u.

Chemin^{che} hua dehve rahcó,^{andahre} din tan^{ihyan} nducó.

⁷ Condi^{che} ne ihyan ndinan^{yahn} ne che cahndudo^{ye} Ndudo yahn Dendiohs, chihnevan^{ne}. Cuihco^{nchuhn} cudado^{nduhca} che vatechica^{ye}, ne cuiquendi^{ne} yune yahn^{ye}, cuitahno^{ne} Dihvo vo Jesucristo^{nduhca} che ritahno^{ye}.

⁸ Dihvo vo Jesucristo ne, ama no vederihquentiyon yahn ye. Numacuahn ro, nde nan che canan, nde meniyon, nde ro che cochi ne, hua ndacorun.

⁹ Hua quendi nchuhn dehtenduh costumbre che ricuahn ihyan. Tahque ndah che cochahtino ne Dendiohs, ihyan min che yahino ye nchuhn, che co che quendi ne ama ndeh nan costumbre nan dehtenduh che reh ne, te costumbre chemin chan ne, hua richihve nde cava man ihyan che riquendi ye.

¹⁰ Nan vederihquentiyon ndico me ne, rihco chidocuyan chahn vedino nan ta, ne nan ntiyon min riquendah che reh ye. Ate man che ndahco cade Dendiohs vederihquentiyon min ne, tahque ndah ro yuhn vo che co ihyan chahn, te Dihvo vo Jesucristo ne, chi ye nduhca ama vedino nan Dendiohs, chih ye cava nunde yuhn vo.

¹¹ Nan vederihquentiyon ndico me ne, renda chidocuyan che tahque ndinan Nan Ta che Tahque Yudo, nda ye yun yahn ite che ri vedino cava che nchahco Dendiohs nunde yahn ihyan. Me yute yahn te ne, riquiyahn ye ama lado, cuahn chihto yan.

¹² Namin Dihvo vo Jesucristo ne, cuahn chihto yan nahn yah sandado ihyan, chih ye. Min chera yun yahn ye cava che nchahco Dendiohs nunde yuhn vo, nedin yahn ye uvo.

¹³ Chemin che cochahtino vo Dihvo vo Jesucristo, quendi vo yune yahn ye, andahre ndahchenan ihyan uvo, nduhca che chahno man ye.

¹⁴ A devano vo te ndiyu muhn iyehnse cuah-tenan vo cuahn dama, te chenano ino vo che

ndeva Dendioh uvo, cuahtenan vo vahchetero numacuahn ro.

¹⁵ Nducote tihca ne, cochahtino vo Dihvo vo Jesucristo, ndeva vo yavenan Dendiohs cuahn dama, cahnevan ihyan chenahn. Chemin ne, anduhneca ama vedino che cah vo Dendiohs.

¹⁶ Codin nchuhn che ndah man, codin ne vedevahino nduco ihyan che va vederetahn yahn ye man, te chemin che renan ino Dendiohs.

¹⁷ Cuenevah necun nchuhn ihyan ndinan yahn yaco, codinahn ne yahn ye, te ihyan chahn che nda cuande ye nchuhn, ne va che necah cuande ye Dendiohs cava ne. Runecade cuahtenan nchuhn cava che hua cuih ne vederan ihyan chahn, ne co yeno ye cava ne, te ndete che hua runecade cuahtenan ne ne, nde hua cochihve che redin ne.

¹⁸ Covah nchuhn cava nuhn. A devano nuhn te runecade vatechica nuhn, ne nahn quendi nuhn din nuhn che ndah.

¹⁹ Nde tahque nahn che covah nchuhn cava che cuahnecun Dendiohs che hua condah ndaconan chi quendihcheró nchuhn.

²⁰ A Dendiohs che redin ye che rahte dihn chedave yuhn vo man, che ndedetuhche ye Dihvo vo Jesucristo man, ihyan min che ndah redin ye cudado uvo nduhca che redin ihyan cudado itecuche yahn ye. Dihvo vo ne, chihco mendahn ye ihyan, chih ye, chera yun yahn ye, din ye che chinahn vederihquentiyon ra che hua nda ro che cuihno.

²¹ Chemin che din Dendiohs che cuahtenan cuma nchuhn vederihquentiyon yahn Dihvo vo Jesucristo cava che runecade cuahtenan ne, din

ne che ndah nduhçá che nahn ye. Ndeva vo yavenan Dihvo vo cuahn dama. Tihçá co.

²² Dihnó, dirún tah yahn ne, ne ricá nchuhn che din chahtino ne che riyahvé nchuhn.

²³ Reté, checadino nchuhn te dihno vo Timoteo ne, a ndiquendah se vacoyahn. Ndete che nda nun se muhn ne, quendá sahn cuahn che chí quendihcheró nchuhn.

²⁴ Cueneçah ne Dendiohs nducoyaca ihyan ndinan yahn yaco man, nducoyaca dihno vo chenahn man. Cuendeva ne Dendiohs yahn dihno vo che vate ye nación yahn Italia.

²⁵ Dendiohs din yahino ye nducoyaca nchuhn. Tihçá co.

El Nuevo Testamento: Cuicateco de Teutila New Testament in Cuicatec, Teutila (MX:cut:Cuicatec, Teutila)

copyright © 1972 Wycliffe Bible Translators, Inc.

Language: Cuicatec, Teutila

Translation by: Wycliffe Bible Translators, Inc.

Cuicateco, Teutila [cut], Mexico

Copyright Information

© 1972, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Teutila

© 1972, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

6bd8292c-2070-5c2d-8b8b-378bf0f66afe